

بِسْمِ اللَّهِ الرَّحْمَنِ الرَّحِيمِ



PANDO'AN 3

Sii ko Kalangkapan a manga Insan sii sa Doniya

as Salamo Alaykum wa Rahmatullahi wa Barakatoho,

Pagari ko a Insan lomiagaday dn so Insan ko polo'an a manga ragon na anda ka matatago'? ay kala' a miatonay nka ko manga atastanggongn o ompongan ko kiphapantagn iyan ko pagtaw.

So pagtaw nka na nanayawn ka niyan, so pagtaw tano na mikakagm ko pithibarang a manga awid a akal a barandiya' a go rahasiyan, na andaka dn imanto?

So btad o Insan sankai a miaipos a phakasapolo ragon na somiagad sa mabasng a linog so ginawa niyan sa inayoong so panagayanan iyan a paratiaya a go panarima' a go sabot sabap ko kiasagomparak sa tindg ko kiphrapasn ko manga galbk o Insan, sa aya minitolad o lalakaw niyan na so Insan na da' a matitiman a tindg iyan sa apiya so olowan a itotoro' iyan na kiadaan sa arga' so manga katharo' iyan, sa oman i salompok ko pagtaw o ompongan na kominowa sark iyan a tindg, sabap ko kiatoona niyan sa ginawa niyan a lomiawan sa kapasang odi' na kata'o ko kaphagistihadi ko btad o Islam a go so pagtaw, sataman sa miaadn ko sold o Insan so lompokan a aya kabaya' iyan na thoyokn iyan so lawas o ompongan sii ko kabaya' iyan a tindg sa aya miaonga oto na so sapak na aya mimbalo y a tomadng, sa datar o ba so kawang na domiyogayas sa mabagr a oran a da' a gabon sa langit, na piakammsa oto a btad.

So Murshid sa Insan na adna tindg iyan sabap ko kikakarangn iyan ko khabolosan o btad, na da'pamakin'ga o sabagi' a adn a tindg iyan a salakaw, na sabap ko kiaparampang o btad ka kagiya miaadn ko sabagi' a manga insan so btad a kakopor a go kalawan sathipho' na, aya miapamikir o manga mamponay sa pamikiran ko sabagi' a manga Insan na so kambaloya ko masa a phakabolongn ko sabaad a ragawr ko oriyen o kasagad iyan, sa miatognos dn a so sabagi' a di masosorot ko btad o Insan sabap ko kalombat iyan i lalakaw na minggibas siran ko lawas o ompongan a matitiman sa pakaasal sabap ko di kakhaparo o sorong a ibbtad iran a go so da kagagaa sa ba mipilak so Murshid o kalangkapan a inampda' na tominkayos siran sa goris a salakaw a miakatonay oto sa kiatharo'a iran sa so Insan a go so lompokan iran na pagltan a langit a go lopa' so khawatanaan o tindg a go so panarima' anka'i a asal a golawasan o Insan a go so bago a tindg a kominowa sa manga inampda' iyan a ptharos ko lalakaw niyan.

Pitharo' o Murshid a langowan a btad a pkhibago sii ko sold o Ompongan a go sii ko liyo niyan na patoray pphakaokit sa shura sa giipmomosawiraan so kazmbaga on, sa pakanggolalann so mabagr a dirogod ko mambbtad, ogaid na da oto makowa sabap ko

oman i isa na adna kamapiyaan iyan a rk iyan a kabaya' a aya niyan pakalalankolobn sii ko lankap a kamapiyaan o Ompongan.

Misabap san, na lomiagaday dn so manga ragon, sa oman i lompokan a pamikiran o manga Insan na miabatiya' so bontal iyan sa miakilala so ko'at iyan, sa so sabagi' na inankon iyan a mala'i sabot ko Islam a di so ulama o Ompongan sa miamgay sa manga kokoman a rk iyan a ipmbagr iyan ko tindg iyan sa liyo ko kianggibas iyan a pamikiran sii ko pamikiran o Ompongan, na riompakan iyan so tindg o kalangkapan a Ummah sii sa doniya, sa datar o ba skaniyan bo'i bigan sa sabot a bnar, sa kialipatan iyan a da' a taw a palihara' (ma'sūm) ko oriyen o Mohammadﷺ, sa so kapapalihara (ismah) na sii inibgay o Allāh ko lompokan o Ummah ko kalangolangon iyan, samanan na kiatokawan tano a so ompongan o manga Muslim (jama'ah) na ron matatago' so toro'an ka di khaompong sii ko kadadag, amay ka so lompokan o manga Muslim na miprarakhs iran so manga ulama iran.

Imanto na gomimaw so sabaad a manga kangodaan a manga alim a phagrarn iran so manga toto'a a Ulama sa kapakithindga' sa sabot ko Islam (debate) sa aya paratiaya iran na siran i manga tata'o a go manga papasang sa pphakalankapn iran ko kadandan o pagtaw sa bontal a kapangrar, sa kalilipatan iran a o smbaga siran o manga kaka a manga ulama na antaa ikhokom kiran? so kalangkapan a pagtaw a apiya so alif na di ran katawan na siran i phakakokomn ko manga tindg a tanto a madalm a randiyar iyan, misabap sa nkanan a btad na miabaramaana so pagtaw sa miamagoman ko kapaparampang sa miataap so pamikiran iyan, sa aya pkhaologan on na so kagowad a go sisingay sank'a i a manga taw a pphakiilay ran so kapasang iran sa kapphayaga iran sa siran i manga tata'o a biaksa' ko sabot ko Islam.

Antaa i khasnditan san? Aya giimatharo' o sabagi' a manga taw na gianka'i a manga rinayagan a bago a miapayag ko kaoparik na aya dn a phoonan iyan na so Ompongan a Insan ka ilaya niyo man a manga taw anan ka giyanan so manga mama a tomataalok siran ko Ompongan a Insan.

Samanan na so langowan a rarad a marata' o giikapagoparik satindg o sabaad a manga inampda' ko Insan na pkhisndit ko Ompongan tano sa gii niyan maphaoto so rarad iyan a skaniyan ko kamataani ron na angiyas san sa di ron pd.

So saknon a Murshid o Insan na miaona dn so kapkhailaya ko ko bobolos o manga taw a kopor a lomalawan sa thipho' sa aya gii akn tharo'on ko manga taw a pphangamad na so Insan a moonot ko tindg o Murshid na angiyas san sa langowan a angiyas, a di dn pangindaw so kapphayaga on ka siran dn i mitharo' sa so Insan a go so rk iran a tindg na khawatana' sa datar o kakhawatana' o lopa' a go so langit, na antonaa pn i tindg a ba niyan anan kalawani ko kiapayag o mibidaan o dowa a tindg.

Samanaya, na maphakakokom tano so kazagad o manga gawii a go so manga olanolan ago so manga ragon sa khailay so onga niyan ko oriyen o masa.

So sabaad a manga insan ko miamaganad on sa Islam maana a pd ko manga alim na kominowa siran sa galbk iran a igaganat iran ko ingd a piaganadan iran sa kata'o ko ingd o manga Arab, sa da' a ba roo lakit lambay o Ompongan ka da iran on odasn a go di niyan katawan, na inibaling iran sa Ranaw na aya kabaya' o sabagi' a Insan na songowan siran o Murshid ka an iran mandirogod so antap a galbk anka'i a manga galbk iran, mapiya pn miokit sa kakhitaba' a go kaplawana sa kapasang.

So Murshid ko kadakl o manga galbk iyan, a di phakaato so oras ko kadakl o galbk, na di khaparo so oras iyan o ba niyan pn kalakata so manga kapalawan sa pantag sakapamisita sa manga bolayoka' a thatapok siran ko pagtaw a Muslim. Sa taw a pangindaw niyan so katokawi niyan ko tindg o Murshid na khatoon iyan so Murshid ko kalimodan o manga Insan sa MSU na ron iyan panompanga sa sambu' a kaphlobaa on o Murshid.

Tomoon o Murshid a so isaka oras iyan a ipagontod iyan ko kapzorat iyan sa manga kata'o a go so gii niyan kandiorobasa'i ko manga hadith imanto dn a masa a kapapantagan na aya lbi a galbk iyan ko Islam a di so kapakindadaaka sa manga tindg ko sabagi' a manga pagariya' ko Insan a go sii ko Islam.

Giyanka'i a masa na so pagtaw a Musim na mangingindaw sa mala' a kata'o a go sabot ko Islam, na paliogat ko manga taw a somiabot sanku'i a agama a kalngana iran ko langowan a pagr iran a kata'o a go pamikiran sa kapangndaowa iran ko pagtaw sa nggolalan sa katharo' na aya mala' na misorat iran so manga gonana'o iran ka an matatap so rarad iyan ko oriyon o masa, ka so kasorat sa kitab i pithamanan a mala' a galbk a mala'i rarad ko Islam a di so salakaw ron a okit ko kapanampay.

Si Sayd Qutb a go so manga ala' a ulama ko Islam a piamitin siran o pagr o rido'ay na o da so manga kitab iran a minipanorat iran a pkhabatiya sanku'i a masa tano imanto na antonaa pn i kaokhaog a khapayag ko oriyon o kiapangasasahid iran.

Amay ka lingan tano so panamar tano ko kaoladi rkitano ko sabot ko Islam, na kagiya masowa tano sa miamaka kowa tano sa manga master's degree a go manga doctorate, na mialing tano ko pagtaw tano na da tano pn misampay so kata'o a piangraw tano so kizampayin on ko manga taw na ba tano dn mizabir sa panginam ko sorga' a al Firdaws sa miada' tano sa doniya, na gianantan tano so pagtaw tano a mikakagm ko kada' a sowa ko Islam, na ba gianan i siyowa' o manga Nabī a oriyon o kiasogo'a kiran na mizasabir siran sa thmowan ka an siran mangasasahid sa saprk mata, sa da iran matoro' so pagtaw iran sa siogo'an kiran sa panginam ko Sorga'? na anda so sarig a kata'o a piangraw tano ino minisampay tano ko manga taw antaa ka da'?

Paliogat a masabot so okit a kapagmaa ko kata'o a so khakakangan so taw sa kakang a apoy ko Naraka amay ka pagmaan iyan so kata'o a miasowa' iyan. Kna' o ba aya bo' a bantak san na so opama o iza'i ka sa kata'o a katawan ka, na da nka tharo'a sa piagma' aka na ba gioyoto bo', pd san so taw a miaganad sa kata'o na kagiya kalaan ko kata'o na da niyan sampayin ko manga taw sa nggolalan sa kapangnda'o a go kapanolon, a go kapanorat sa manga kitab kaba niyan dn tionkop saginawa niyan so kata'o niyan sa piagma' iyan ko manga taw, na skaniyan na minirampat a miamagma sa kata'o. ka so kata'o na anda i katago' iyan ko taw na minisanggolay ko lig iyan so paliyogat a kapanampay a go so kanggalbka ko kitogalin iyan ko manga taw a rakhs a zabarn iyan so manga rrgn a khabaak iyan ko kisampay niyan ko manga taw, sa langon a kata'o a pangindaw o manosiya na pd san a ipapaliyogat ko khirk on a kisampayin iyan on, na aya lawan on sa kipapatoray na so kata'o ko Islam a aya onayan iyan na so kaknala ko Allāh a go so kasimbua on.

Aya paliyogat ko Muslim na so kanggalbka niyan ko kasimbua niyan ko Allāh a giyanan i onayan a antap o kiaadna on, kna' o ba aya paliyogat on a paganay na so kapakatindga niyan ko Dawlah Islamiyyah, ka di phakatindg so parinta a Islam a da' a manga taw a zirong ko pandi' iyan. Kna' o ba aya izomariya o Allāh ko oripan iyan ko alongan a maori na: Ino

miapakatindg ka so Dawlah Islamiyyah? Aya izomariya o Allāh ko oripn iyan na: Ino mianggalbk ka so simba a tolalos rakn a da' a salakaw a biantakan ka on? Pitharo' o Allāh a:

***Go da ko adna so Jinn a go so Manosiya inonta a pantag sa
ana ko iran masimba.***

Amay ka masabot o manga manosiya so thitho a simba ko Allāh salinang a sabot, na khaonga oto so kaphakatindg o Dawlah Islamiyyah sa da' a phakarn on a bagr ko doniya, ka aya onga o sanang a simba ko Allāh na so kaphakatindg o parinta niyan ko liawaw o lopa'.

Imanto na aya panamar o sabagi' a Muslim na phakambowatn iyan dn so onga a da pn a miapamola niyan a pamomolan odi' na kayo a khaonga niyan ankoto a babantakn a onga a pagadnn iyan, na andamanaya i kakhaadn oto? Piakammsa anka'i a masa tano a phagadn tano sa onga a da pn a pamomolan a minibizok tano ko lopa', phakaorann tano so langit a da pn a ba on gabon, pagadnn tano so sapak a da pn a onayan a tomadng o kayo a khapoonan o sapak, ba anan di khasana'i a kakklid o btad na anda i nanayawn a onga?

Piakisabotan rkitano o Allāh a so kapnggalbk o agama niyan sii ko doniya na inisankot iyan ko panamar o oripn iyan sa nggolalan ko kabaya' iyan a bithowan sa (irādah shar'iyyah), kabaya' o Allāh a inisankot iyan ko sabap a go so misasabap on (Cause and Effect). So doniya na kna' o ba ingd a mujizah a so pnggolalan on so kabaya' o Allāh a bithowan sa(irādah kawniyyah) a giyoto so kabaya' iyan a: "Adn ka na khaadn" sa da' a sabap iyan ka sii oto khaadn sa maori a alongan. Pkhailay so sabagi' a mu'jizah sii ko doniya ko masa o manga Nabī a go so manga Rasul a miawid ko panolon iyan na pantag sakapakaparatiaya o manga taw na piakinggomaan kiran so mu'jizah. Oriyan o kiaipos o Mohammad ﷺ a kaposan a Sogo' ko doniya na miada' so kapkhailaya ko mu'jizah, sa so Qur'ān na aya mu'jizah a inibgay o Allāh ko manga oripn iyan na sa dn sa kala'a sabot o Muslim ko Qur'ān na kala' a bagr iyan ko lopa', na sa dn sa kaito' a sabot iyan on na kaito' o bagr iyan ko kassmpanga niyan ko rido'ay niyan.

Sabap san manga Insan na pkhasowin tano maloy anka'i a manga katigan a miathay dn so kiaosaya tano san ko manga masa tano a miangaiipos ka kagiya pkhalipatan tano, ka kalokalo na adn rikitano a makasabot on sa sabot a kanggalbk sa makapromasay sa kapakalankapa niyan on ko kadandan o manga Inampda' sa Insan.

Aya piakammsa sankai a masa tano na anda dn i adn a inilapoy o Murshid iyo a Pando'an rkitano a manga Insan na tanto a magaan a giikazasariat o sabagi' a Inampda' sa di niyan ipndalndalm sa dirogod a matolangd sa pkhaemotional so nggagaisa sa magaan a kapzmbaga niyan ko Murshid sa di niyan pagamadan ko antap iyan, ka sii niyan pzmbaga sa kalangkapan a datar o ba mbiyag sa apoy a phakarabrayin iyan ko kalangkapan a Inampda' a kalilipatan iyan a waraan o sabagi' a Insan so kabaya' sa kambrak a somasayan siran sa manga babay a ropt i modul a mababaya' sa kambrak a da' a rarantk iyan.

Miakaampl dn a thoma so somiagad a masa a kiasagala o Insan ko kiapamagagaw sa tindg, a mala' a miasangan on o manga inampda' ko kiapakasorazaba on ko kiaphapawala' sa Internet ko manga tindg ka oman i isa na da' a phakasagadn iyan a katharo' inonta a ssmbagn iyan. Sa manga Insan kipaya dn oto a kowaan tano a thoma ka da' a ba tano roo miarbas a mapiya a rowar sa kiapakaolad o go'ang (gap) ko nggagaisa rki tano.

Adn a mitharo' ko sabagi' a inampda' a ino kon so Murshid a datar o ba niyan pphakigdamn a mala'i paratiaya a di so salakaw ron?! Pzapa' ako rkano manga Insan akn ka da ko waraan akn o ba akn pangandagn so paratiaya ko, ka so paratiaya na aya bo' a mata'o ko taks iyan na so Allāh, da ko pn pamikira o ba akn pakaokita ko ngari' akn a mala' ako a alim a mapasang ko manga ulama, ka aya tindg akn na sakn so pinakamaito' a alim a da' a sowa iyan ko manga kata'o, go taw ako a mangangalimbabaan ko apiya antawaa a manosiya, da rakn so katakabor, a go so kaambog, mapiya i kapphangilati rakn o sabagi' a manga Insan antaaka di Insan, na mana kn a di sino ka katatadman akn so pananaroon a Mranaw a:

***Ba ko dn pthonkopa sa di ron kasban o taw ka aya man a so darm na baana
mata'o ron a rowar ko da marimbang a Tuhan a Mahasuti.***

Aya bo' a kaphagaloya ko san, na kagiya pd anan ko btad a ipzorat o pansom o iringa' ka so dawat o thotholan na di malbod maponas ka ipndakat o masa a pd anan ko kiazinagadan o Insan ko lalakaw niyan ko History.

Rinilaan ko skano dn a manga Insan akn sa da dn a rata' a ginawa ko rkano, sa rila'i ako niyo mambo' ka taw ako a malobay a go malmk a ba dn pipharo' o Kadnan a sakn i bialoy niyo a Oripn iyo sankai a Ompongan tano, na aya mapiya rki tano na so kapakatolangda ko niyat a go so panagontaman sa kisampay ko simalaw, ka oman somagad so gawii na makarani so lalakaw san ko manga kobor tano, na oman i isa na pagizaan ko pinggalbk iyan sankai a doniya.

Adn a pananaroon o Abū al Attāhiyyah a:

***Sayana so lawanda' a mabibimban a sonor ko orarig o doniya,,,
Sa kalilipatan iyan so rarikan o kapatay a marani pkhagiling...***

Allāhu Akbar, lomindong tano ko Allāh o ba tano maikmat anka'i a doniya, sa oman i isa a Insan na pamakotn iyan dn so ginawa niyan sa katonaya niyan ko kapasadan iyan a gitass iyan ko It iyan a go so Kadnan iyan, ka mataan a so kapasadan a diyandi' na ipagiza' o Allāh ko taw a migay ron.

Wassalamo Alaykum,,,

al Murshid

HASSANOR BIN MAKALAPA

16 December 2014